

Hürdó, No Doño

Boneiru ta konsiderá un líder di e movimiento ekológiko pa hopi aña kaba. Esaki ta bèrdat mirá di e banda di konservashon. Nos leinan ta prohibí harpunamentu di piská. Ta kontra lei pa hasi daño na koral den e awanan rònt di nos isla. No ta pèmití pa kohe turtuga, karkó chikitu, flamingo, i lora. I asta yuwana ta protehá den Parke Nashonal Washington-Slagbaai.

Pero ekologia no ta trata solamente konservashon. E tambe tin di hasi ku polushon di nos medio-ambiente. I di e banda ei, hopi di nos tin hopi di siña ainda.

Nò, nos no tin polushon den aire manera Mexico City, unda por ta peligroso pa hala rosea. Te ainda nos ta i tin Bon aire. Maske ta un echo ku nos ta basha sushi den nos laman, nos no konosé polushon di awa riba eskala di e lago Erie na Merka ku un tempu a ser deklará “morto.”

Ma kiko nos por bisa di polushon ku nos ta topa diariamente riba nos isla? Maske kos a mehorá, ainda ta un bèrgwensa pa mira tantu bòter, kùp, bleki di serbes, èts. bentá riba kaya i kantu di kareteranan. Ta un pena pa mira hende si heful zuai kùp òf bòter for di bentana di outo. Ta duna un disgusto pa topa sitionan den mondi ku hende a tuma komo nan lugá privá pa basha sushi.

Si hende su reakshon pa ku polushon ta bèrgwensa, pena, frustrashon i disgusto, kuantu mas Esun ku a krea nos dushi isla ta sinti'è!

Nos mester realisá ku **Dios—no hende—ta Doño** di mundu. E ta Doño di mundu, di nos isla, pasobra El a kre'è. *“Laman ta di djE, pasobra E ta Esun ku a trah'è. Su mannan a forma e tera seku”* (Salmo 95:5). *“Tera ta di SEÑOR, i tur loke ku e ta kontené, mundu, i esnan ku ta biba den djé”* (Salmo 24:1).

Ma despues di krea hende, Dios a duna nan e tarea pa atministrá Su kreashon. El a bisa nan: *“Sea fruktífero i multipliká, i yena e tera i hasi esaki someté na bo”* (Gènesis 1:28). Ma no malkomprendé. *“Someté na bo”* no ta duna libertat pa malusa òf abusá. Alkontrario, *“Dios a kohe e hòmber i a pon'è den hòfi di Eden pa kultiv'è i kuid'è”* (Gènesis 2:15). Huntu ku e privilegio ku Dios a duna hende pa **atministrá** Su kreashon, El a duna e responsabilidat pa **kuida** kreashon.

Ora bo ta hür un kas, bo no por traha bentana nobo, dèmpel un porta, konstruí un otro kamber sin pèmit di e doño. Ta méskos ku e kreashon di Dios. Ta komo sifuera nos ta hür nos isla di Dios. Debí ku Dios—no nos—ta Doño di nos isla, nos tin e derecho pa usa kreashon **solamente segun e Kreador ta deseá. Nos no tin e derecho pa malusá kreashon.** P'esei nos tin deber di tene nos isla limpi i protehá nos medio-ambiente.

Ademas, Dios ta eksigí pa bo *“stima bo próhimo manera bo mes”* (Levitiko 19:18). Si bo benta un kùp riba kaya, bo ta ignorá e mandamentu aki. Pensa un ratu kon e akto chikitu ei—e ún kùp ei—huntu ku tur otro kùp, bòter, papel, bleki, èts. por afektá otronan.

Bo kùp por tin un afekto riba e impreshon ku turistanan ta haña di nos isla. Nan impreshon ta afektá nos ekonomia, i nos ekonomia tin un afekto riba nos tur. Bientu por manda **bo kùp** den kurá di otro hende. Sigur habitantenan di e kas ei lo no haña ku bo kùp sushi den nan kurá ta un gesto di amor. **Bo kùp** por yena ku awa den temporada di yobida i bira un lugá ku sangura ta brui.

Nos aktitut irresponsabel, nos maluso di kreashon, i nos flohera pa pone sushi na e lugá korekto, ta reflehá egoismo na lugá di stimashon pa nos próhimo. E tambe ta demonstrá ku nos ta falta di komprendé ku Dios—no nos—ta Doño di nos pida di baranka.